

orth/so mit dem Buchstaben c. verzeichnet ist/ vnd sihe auff der halbrunden Schyben/ wie viel die Regel A F. abschneide/ so findest du 130. Grad/ mercke ste vnd mach ein Punctlein in das Wax/ alsdann rucke die Regel mit dem A F. zu dem d. hinaus/ vnd sihe was die Regel abschneidet/ so findest du 46. Grad/ die mercke auch auff zu der anderen Zahl/ vnd mach auch ein gemerck in das Wax auff der Schyben. Demnach gang zu dem andern stand/ vnd stell das Instrument auff wie zuvor auch/ vnd rucke die Regel A E. gegen dem ersten stand/ vnd mach sie vest/ auff daß sie nit mehr möge verruckt werden.

Demnach misse zwischen beyden Ständen/ so findest du 325. Schuch/ ruck das Absehen G. auff die 325. Puncten/ auff der Regel A E. das ist die Standregel.

Weiter/ rucke die Regel A F. auff der halbrunden Schyben auff die 130. Grad/ vnd ruck das Absehen H. biß daß du zu dem c. in dem Feld der gerede nach hinaus sihest/ so findest du 500. Puncten/ alsdann ruck die Regel A F. auff die 46. Grad auff der halbrunden Schyben/ wie sie bey dem ersten stand auch daruff gestanden ist/ vnd sihe zu dem d. hinaus/ wie du in folgender Figur verzeichnet sihest/ so findest du 930. Puncten.

Wilt du nun wissen wie weit die zwey örther von einandern sind/ wie du dahin gemessen hast/ wie weit es von dem ersten stand dahin ist/ (hab auch dē kunstliebenden diß folgende Kupferstück daher gesezt/ vmb mehreren verstands willen/ daß du sehest wie du die Regel so mit dem I. verzeichnet ist/ aufflegen vñ verstehn solt) so thue ihm also: Ruck die Regel A E. auff die 46. Grad/ auff der halbrunden Schyben/ vnd die Regel A F. auff die 130. Grad/ vnd mach sie beyde vest mit den Schrauben.

Demnach ist an das erste orth hinaus 500. Schuch/ ruck das Absehen G. auff die 500. Puncten/ vnd ruck das Absehen H. auff die 930. Puncten. Als dann nimb die Regel so mit dem I. verzeichnet ist/ vnd leg sie in das Spizlin oder Absehen G. mit dem Löchlin/ vnd halt das ander theil gegen dem H. so findest du 915. Puncten auff der ledigen Regel/ so wisse daß die zwey Dörffer

D oder